

ЯЙЛОВ  
МУАММОСИ  
ҲОКИМ  
НАЗОРАТИДА



2-бет

ПРЕЗИДЕНТНИ  
ИНТЕРНЕТДА  
ҲАҚОРАТЛАШ  
МУМКИНМИ?



4-бет

ЖАСОРАТ ВА  
МАТОНАТ  
ҚИССАСИ



6-7-бетлар

Қозғоғистон  
Республикаси  
Мустақиллиги  
ва газеталинзи



# Жанубий ҚОЗОҒИСТОН

Вилоят ижтимоий-сиёсий газетаси

1991 йил 5 апрелдан чиқа бошлаган  
Сешанба, пайшанба ва шанба кунлари чиқади

2021 йил 6 апрель, сешанба. №36 (2941).

## ИЖТИМОЙ БАРҚАРОРЛИК – ФАРОВОНЛИК ГАРОВИ

**ДАВЛАТ РАҲБАРИ  
«САМРУҚ-ҚАЗЫНА МИЛЛИЙ  
ФАРОВОНЛИК ЖАМҒАРМАСИ»  
ҲЖ РАИСИ АЛМАСАДАМ  
САТҚАЛИЕВНИ ҚАБУЛ ҚИЛДИ**

Қасим-Жўмарт Тўқаевга жамғарманинг жорий фаолияти, Президентнинг муқаддам берилган йирик инфратузилмавий лойиҳаларни амалга ошириш, ижтимоий барқарорлик, шунингдек, «Самруқ-Қазына» компаниялар гуруҳининг молиявий барқарорлигини таъминлаш юзасидан кўрсатмаларини амалга ошириш доирасида олиб борилган ишлар юзасидан ҳисобот берилди.

А. Сатқалиев Давлатимиз раҳбарига «яшил» иқтисодий тараққиёти билан боғлиқ янги иншоотларни барпо этиш режалари, шунингдек, жамғарма маблағларини хусусийлаштириш борасида маълумот берди.

Учрашув якунида Президент «Самруқ-Қазына»ни ривожлантириш дастурига оид қатор аниқ кўрсатмалар берди.

Akorda.kz.



Президент Миллий банк раисини қабул қилди Қозғоғистон Президенти Қасим-Жўмарт Тўқаев Миллий банк раиси Ербўлат Дўсаевни қабул қилди.

### ФУҚАРОЛАР МАНФААТИ – БОШ МЕЗОН

Давлат раҳбарига жорий йилнинг биринчи чорагида пул-кредит сиёсатини амалга оширишнинг дастлабки натижалари тўғрисида маълумот берилди.

Миллий банк раиси пандемиядан сўнг иқтисодий тиклашда юзага келиши мумкин бўлган асосий муаммолар тўғрисида ахборот берди. Президентга мамлакатнинг 2020 йил учун тўлов баланси, умумий халқаро захираларнинг ҳолати, олтин захиралари тўғрисида маълумот берилди.

Ербўлат Дўсаев Давлат раҳбарининг Қозғоғистон фуқароларининг пенсия жамғармаларини муддатидан аввал фойдаланиш ва Миллий тўлов тизимини яратиш бўйича кўрсатмаларининг ижроси тўғрисида ҳисобот берди ва уй-жой сиёсатини ислоҳ қилиш юзасидан таклифлар билдирди.

Учрашув якунида Давлат раҳбари Миллий банк раисига қатор аниқ кўрсатмалар берди.

Akorda.kz.

## БЕҚИЁС ҒАМХЎРЛИК, ЮКСАК ЭЪТИБОР

**МАҚТААРАЛ ТУМАНИДА КўП БОЛАЛИ ВА КАМ ТАЪМИНЛАНГАН 50та ОИЛА ЯНГИ БОШПАНАГА ЭГА бўлди**

Уй-жой олиш учун навбатда турган 50та оила «Нурли ер» дастури доирасида барпо этилган ижтимоий уй-жой билан таъминланди. Туркистон вилояти ҳокими Ўмирзақ Шўкеев Мақтаарал туманига хизмат сафари билан ташриф буюриб, тумандаги вазият билан танишди.

Вилоят раҳбари Мирзақент овулидаги янги қурилган кичик туманда бўлиб, «Нурли ер» дастури доирасида қурилиши режаланган кўп қаватли уй-жойлар лойиҳалари билан танишди ва қатор муҳим масалаларни муҳокама қилди.

Қурилиши давом этаётган мактаб ва болалар боғчасида бўлган минтақа раҳбари пудратчилар билан учрашди. Қайта таъмирланган «Шухрат» хиёбонини оралаб, янги лойиҳалар борасида фикр-мулоҳазаларини билдирди.

Шунингдек, тубдан таъмирланган Қ. Мунайтпасов номидаги марказий ўйингоҳда бўлиб, туманда оммавий спортни ривожлантириш режаларини пухталади. Мирзақентда фойдаланишга топширилишга шай турган амбулатория-шифоҳонанинг жиҳозланишига ҳоким юксак баҳо берди. Таъкидлаш жоизки, худди шундай

соғлиқни сақлаш муассасалари яқинда Ўрғебас ва Фирдавсий қишлоқларида ҳам эл эзгулигига берилади.

Бундан ташқари, ҳоким Мирзақентда қурилатган бошқа ижтимоий иншоотлар билан ҳам яқиндан танишди. Барпо этилатган мактаб ва болалар боғчасини кўздан кечириб, пудратчи ташкилотлар раҳбарлари билан учрашди. Таълим муассасаларини янги ўқув йили олдида фойдаланишга топшириш юзасидан кўрсатма берди.

**Вилоят ҳокимининг  
матбуот хизмати.**



# ЯЙЛОВ МУАММОСИ ҲОКИМ НАЗОРАТИДА



Жетисай, Мақтаарал, Келес туманлари аҳолиси билан учрашувда вилоят ҳокими Ўмирзақ Шўкеев улар билан қатор долзарб масалаларни муҳокама қилди. Учта туман ҳокими ва аҳолиси иштирокидаги йиғилишда яйлов масалалари бош мавзу бўлди.

Шуни таъкидлаш жоизки, ҳозирги вақтда чорва молларининг аксарият қисми қишлоқ атрофида боқилмоқда ва натижада ерларнинг табиий қуввати йилдан йилга пасайиб бормоқда. Чорва моллари сонининг кўпайиши ҳам ерлар тақчиллигига олиб келмоқда. Бундан ташқари, кўплаб ерлар хусусийлаштирилган. Туркистон вилоятида яйлов ерларини тартибга солиш бўйича ишлар уч йилдан

буён олиб борилмоқда.

Уч туман аҳолиси билан учрашувда вилоят ҳокими маҳаллий ҳокимият ва мутасадди шахсларга яйловлар масаласини ҳал қилишни топширди.

Шу билан бирга, Ўмирзақ Шўкеев «Сабыр» деҳқон хўжалигининг фаолияти билан танишди. Хўжалик деҳқонлари бир майдондан 2-3 марта ҳосил олиш ло-

йиҳасини фаол амалга оширмоқда.

Минтақа раҳбари ишчилар билан учрашди. Миришкорлар карамнинг дастлабки ҳосилини йиғиб олишга тайёргарлик кўришмоқда. Шунингдек, улар ушбу лойиҳанинг самарадорлиги билан боғлиқ тажрибаларини билан ўртоқлашдилар. Биринчи ҳосилни йиғиб олгандан сўнг, улар тарвуз экишга киришади. Маҳаллий деҳқонлар ушбу лойиҳа ёрдамида йилига гектаридан 8 миллион тенгегача даромад олишмоқда.

Вилоят ҳокимининг  
матбуот хизмати.

«Туркистон – туркий оламнинг маънавий пойтахти» мавзусидаги туркий тилли давлатлар ҳамкорлик кенгашининг норасмий саммити муваффақиятли якунланди. Стратегик жиҳатдан муҳим учрашувда туркий тилли давлатлар раҳбарлари сўнгги ўн йилликлар давомида туркий тилли давлатлар томонидан муҳим сиёсий ва ижтимоий-иқтисодий тараққиётга эришилганини таъкидладилар.

## ОЛТИН ДАВРИ КЕЛДИ, ТУРОННИНГ!

Иштирокчилар, шунингдек, туркий оламда кўп қиррали алоқаларни ривожлантириш ва туркий давлатлар ўртасидаги ҳамкорликни янада чуқурлаштиришга эътибор қаратдилар. Бундан ташқари, саммит доирасида Туркистон декларацияси қабул қилинди. Туркистон расман турк дунёсининг маънавий пойтахти мақоми берилди.

Оламшумул аҳамиятга эга тадбирдан сўнг вилоят марказида «Туркистон – туркий оламнинг маънавий пойтахти» мавзусида давра сўхбати уюштирилди. Тадбирда Туркистон вилояти ҳокимининг ўринбосари Сакен Қалқаманов, маҳаллий олимлар, вилоят этномаданият бирлашмалари аъзолари ва



фаол ёшлар иштирок этишди.

Учрашувни очган вилоят ҳокимининг ўринбосари Туркистон қадим тарихга эга муқаддас замин эканлигини таъкидлади. Европа ва Осиёни боғлайдиган Буюк Ипак йўлининг бош томири Қозоқ хонлигининг пойтахти бўлган. Туркистонга бағишланган ҳамжиҳатлик, тинчлик ва биродарлик каби олижаноб фазилатлар шиори остида ўтказилган саммит ўзини оқламоқда.

Учрашувда олим, файласуф-диншунос, Х. А. Яссавий номидаги Халқаро қозоқ-турк университети Туркшунослик илмий-тадқиқот институти директори. Яссауи Дўсай Кенжетай Яссавий шахсига тўхталди. Университет

вице-президенти, педагогика фанлари номзоди, фалсафа фанлари доктори Амрекул Абуов, вилоят татар-бошқирд этномаданият бирлашмаси раиси Фарид Аюпов, вилоят ўзбек этномаданият бирлашмаси раиси ўринбосари Гулираёно Расулова, вилоят турк этномаданият бирлашмаси аъзоси Ҳусейн Пазаев Туркистоннинг туркий жамият учун муштарак маънавий пойтахт сифатида ривожланиши қардош мамлакатлар бирлигини мустаҳкамлашга ҳисса қўшишини таъкидладилар.

Вилоят ҳокимининг  
матбуот хизмати.

### • Брифинг



Туркистон вилоятида йил бошидан буён коронавирус инфекцияси тасдиқланган 818та ҳолат қайд этилди. Жами минтақада Covid-19 инфекциясини юқтиришнинг 4493 ҳолати қайд этилиб, йил бошидан буён 625 пневмония хасталигини юқтирган бемор рўйхатга олинган.

## БИР МУШТГА АЙЛАНСАК – касаллик албатта ортга чекинади

Минтақа эпидемиологик ҳолат кўрсаткичи бўйича яшил ҳудуд рўйхатида. Шунга қарамай, кейинги икки ҳафтада коронавирус 36 фоизга, пневмония эса 54 фоизга ўсган.

– Бошқа вилоятлардаги вазиятнинг мурракблашишига қараб КВИ ва пневмония хасталиқларига чалинишдан эҳтиёт бўлиш зарур. Улардан сақланишнинг ягона йўли – вакцина қабул қилиш. Афсуски, оилавий байрам тадбирлари тўхтамаяпти. 2021 йил январь ойидан бошлаб 192та тақиқланган

тадбир уюштирилгани аниқланди, – деди вилоятнинг бош давлат санитар шифокори Нурбек Нишанов.

Таъкидлаш жоизки, Туркистон вилоятида айни кунда 127000 киши ўз хоҳиши билан КВИга қарши эмланди. Апрель ойида минтақага вакцинанинг 107000 дозаси етказиб берилди.

Вилоят минтақавий  
алоқалар хизмати.

### • Тайнлаш

## ЖЕТИСАЙ ТУМАНИДА ЯНГИ ҲОКИМ



Туркистон вилояти Жетисай туманига янги ҳоким тайинланди. ҚР Президенти Маъмуриятининг розилиги билан, ротация тартибда Жетисай туманининг ҳокими этиб Мурат Бўлатули Қадирбек тайинланди.

Мурат Бўлатули 1980 йили Чордара туманида туғилган. Олий маълумотли, ҳуқуқшунос, ҳуқуқшунослик магистри. Қозоғистон Республикаси Президенти қошидаги Давлат бошқарув академиясининг битирувчиси. Фаолиятини 2002 йили Қарағанди шаҳар Қазибек бий туманининг прокуратурасида бошлаган.

2011-2016 йилларда ҚР Давлат хизмати ишлари агентлиги тизимида ишлаган. 2016 йилдан буён Арис шаҳри ҳокими.

Вилоят ҳокимининг  
матбуот хизмати.

# ИСТИҚЛОЛИМИЗ РАҲНАМОСИ

**Истиқлолга 30 йил тўлмоқда. Бу унча катта муддат эмас. Аммо, ушбу қисқа вақт мобайнида Қозғоғистон оёққа турибгина қолмай, жаҳон ҳамжамиятида муносиб ўринга эга қудратли давлат бўлиб шаклланди. Иқтисодиёти ривожланди, ижтимоий аҳволи яхшиланиб, элнинг онги ўсди.**

Биз мустақиллик учун курашда ота-боболаримиз бошдан кечирган қийинчиликларни китоблардан ўқиб билдик. Қизил империянинг устуворлик сиёсати чегарадан чиқиб, юртимиз ери таланди, ядровий синовлар майдонига айланди. Тили ва дини ғамхўрликсиз қолди, миллий қадриятлари камситилди. Узоқ йиллар давом этган истибдод давомида эркидан, динидан, тарихидан, тилидан айрилаётган халқимизнинг дардига ана шундай улуғ фарзандлардан бири малҳам бўлди.

номлаган чиройли Шимкентнинг ташқи қиёфаси ҳам анча ўзгарди. Туркистон шаҳридаги замонавий бинолар, маданият ўчоқлари ҳамда ҳордиқ масканлари шаҳарликлар, зиёратчилар ва меҳмонларнинг энг сеvimли масканларига айланиб борапти. Бундан ташқари, шаҳарда Мустақиллигимиз, миллий бойликларимизнинг қадр-қимматини намоён этадиган мажмуалар узлуксиз, биридан кейин бири қад ростламоқда.

Элбошимизнинг жаҳонда тинчлик ўрнатишга камарбаста бўлаётгани, таниқли

лаб, тадқиқ қилдик. Эндиликда улардан ҳам улугвор ва муҳим ишларни бошламоқчимиз», деб ёзади.

Жаҳон иқтисодий инқироzi пайтида ҳам республикаимизда ижтимоий-сиёсий аҳвол анча барқарор бўлиб турибди. Бу эса барчамизнинг бахтимиз, ютуғимиз.

Республикаимизда тинчлик ва осойишталикни қарор топтиришда фуқаролар тотувлиги давлат мустақиллигининг асосий гарови эканини яхши англайдиган Nur Otan партияси ва унга раҳбар бўлиб келаётган Элбошимиз Нурсултан Назарбаевнинг ҳиссаси улкан.

– Элбошимиз – фахримиз ва ғуруримиз. Қийинчиликлару муаммоларга тўла йўллардан сурунмай ўтиб, собиқ Иттифоқда етакчи ўринга чиққан, жаҳон ҳамжамиятини тан олдирган мамлакат



Мустақилликнинг ўз-ўзидан келмагани ёки кимдир ҳадя этмаганини ёдда тутадиган, ота-боболаримиз орзуларини тўла рўёбга чиқарадиган авлодмиз. Элимиз эгаменликка, мустақилликка эришган йигирма тўққиз йилда жуда катта довлар, қийин даврларни босиб ўтганига нафақат қозғоғистонликлар, балки дунё ҳамжамияти гувоҳ.

Қозғоғистоннинг Тўнғич Президенти Нурсултан Назарбаев том маънода янги, мустақил давлат асосини эканини жаҳон ҳамжамияти тан олди.

Элбошимиз Нурсултан Назарбаевнинг доно сиёсати туфайли бугун Қозғоғистон юздан зиёд миллат ва элат учун Ватан бўлиб, Мустақил Қозғоғ эли дунёга танилди. Халқимизнинг барака-бирлиги ортди.

Алашнинг ардоқли фарзанди Ахмет Байтурсиновнинг: «Бошқадан кам бўлмаслик учун биз билимми, бой ҳамда кучли бўлишимиз керак. Билимми бўлиш учун ўқиш керак. Бой бўлиш учун касб керак. Кучли бўлиш учун бирлик керак. Ушбу кераклар учун ишлаш керак», деган нақли бугунги кунда бизнинг шиоримизга айланди.

Элбошимиз «Қозғоғистон-2050» Стратегиясини муваффақиятли амалга ошириб, ривожланган 30та давлат қаторидан жой олиш вазифаси ҳар бир қозғоғистонликнинг олдида турган мақсадидир.

Бугунги кунда иқтисодий тараққиётимиз, маданиятимиз ҳамда фаровонлигимиз ортиб, бунёдкорлик соҳасида зўр ютуқларга эришяпмиз. Нур-Султандек гўзал пойтахтимиз бор. Жанубий пойтахтимиз Алматы ҳам аввалгидан ўзгача қиёфа кашф этди. Айниқса, сўнгги тўрт-беш йилда Элбоши учинчи шаҳар деб

сиёсий арбоблар билан бу мавзудаги суҳбатларини жаҳон оммавий ахборот воситалари таҳлил қилиб, эришилаётган натижаларга ҳолисона баҳо бермоқда. Юртимизда амалга оширилаётган бунёдкорлик ишлари, сиёсий ва маънавий ислохотлар Элбошимиз учун халқимиз, ватанимиз манфаатидан улуғ мақсад йўқлигини яна бир қарра исботлади.

Хориж оммавий ахборот воситаларида Н. Назарбаевнинг жаҳонда хавфсизлик ва осойишталикни таъминлаш, тобора кўпроқ хавф солаётган турли даъватлар ва таҳдидларни бартараф этиш соҳасидаги саъй-ҳаракатлари, ҳам халқаро, ҳам минтақа миқёсида тез ўзгариб бораётган мураккаб вазиятдан келиб чиққан ҳолда янада яхшироқ мувофиқлаштириш ва уйғунлаштиришга катта ҳисса қўшаётгани тилга олинмоқда.

Хуррият байроғини баланд кўтариб, жаҳон сиёсий харитасига Қозғоғистон номли мустақил давлатни киритган инсон ҳақида бир минбар, бир маъруза ва ҳатто, бир китоб доирасида гапирсак ҳам камлик қилади. Зеро, унинг бунёдкорлик режа, лойиҳа ва эзгу мақсадлари кенг қамровли.

Элбоши «Келажакка йўлланма: маънавий янгиланиш» дастурий мақоласида: «Маънавий янгиланиш фақат бугун бошланадиган иш эмас. Биз Мустақиллик даврида ушбу йўналишда бир қанча кўламдор вазифаларни адо этдик. 2004 йили «Маънавий мерос» дастури доирасида Қозғоғистон ҳудудидаги тарихий-маънавий ёдгорликлар ва иншоотларни янгилادик. 2013 йилда «Халқ – тарих тўлқинида» дастури орқали жаҳоннинг энг нуфузли архивларидан асл тарихимизга алоқадор ҳужжатларни тизимли равишда тўп-

раҳбарининг умр йўллари таҳсинга лойиқ. Хуррият тонги отиб, истиқлол қуёши чарақлаган сари юртимизда иқтисодий юксалиш, бағрикенглик, ўзликни англаш, тикланиш шомоллари эса бошлади. Элбошининг халқи олдида берган қасамёди беихтиёр ёдингизга тушади. Ўрдабошида уч қардош давлат раҳбари билан бирга дўстлик байроғини тиккани ҳам ёдимизда, – дейди ёзувчи, Халқаро «Алаш» мукофоти соҳиби Мархабат Байғут. – Ўтган икки йилга назар ташлайлик. Қисқа даврда юртимизда оламшумул ўзгаришлар рўй берди. Элбоши ташаббуси билан ташкил этилган Туркистон вилояти марказида олиб борилаётган бунёдкорлик ишлари Қозғоғистон тарихида бўлмаган. Уй-жойдан ташқари, таълим-тарбия муассасалари, шифо масканлари, маданият иншоотлари, истироҳат боғлари фойдаланишга топширилмоқда. Ҳатто пандемия даврида ҳам халқ хўжалигининг турли тармоқларида залворли ютуқлар қўлга киритилиб, мамлакатимизда иқтисодий ўсиш суръатлари сақланиб қолмоқда. Ўтган йил якунлари бўйича ишлаб чиқарилган ялпи ички маҳсулот ўсишининг ўзи фикримиз исботидир.

Дарҳақиқат, бундай ривожланишлар замирида, шукроналик, ҳаётдан мамнунлик ётса, буларнинг ўзагида тинчлик сингари олий неъматлар қарор топади. Демак, тинчлик барқарор экан, юртимизнинг турли ҳудудларида ободончилик, бунёдкорлик ишлари бардавом бўлаверади.

**Баҳорой ДҲСМАТОВА.**

## ЭЛБОШИНING ЁШЛАРГА НАСИҲАТЛАРИ

Бизнинг умумий бойлигимиз ҳисобланмиш қозғоғистонча ютуғимизнинг учта калити:

**Биринчи.** 140 этносни бирлаштирувчи барча қозғоғистонликларнинг бирлиги – бениҳоя улкан бойлик.

Барчамизнинг бурчимиз уни асраш, мустаҳкамлаш ва бойитиш. Биз дунё уммонида ўз йўналиши бўйлаб эсон-омон оқиб келаётган қайиғимизни ҳеч кимнинг чайқатишига йўл қўймаймиз.

**Иккинчи.** Бизнинг барчамизга ва ҳар биримизга хос бағрикенглик. Этник ва диний бағрикенгликнинг моҳиятини англамоқ ва ҳурмат билан қабул қилмоқ. Шу орқали хилма-хиллигимиз бизни ажратмайди, аксинча, бирлаштиради.

Агарда, бизнинг сабр-бардошимиз бўлмаса, қайиғимиз йўлдан адашиб кетиши эҳтимол. Сўнгра, ҳалокат юз бериши муқаррар.

**Учинчи.** Тарихий тақдиримизнинг умумийлиги. Бош мақсадимиз – ўзгарувчан оламдаги янги вазиятларда фақат нуфузимизни сақлаб қолишгина эмас, шу билан бир қаторда аввал эришган муваффақиятларимизни орттирмоқ, янги оламга таъсир этиш имкониятларимиз доирасини кенгайтириб, ривожланишда давом этмоқ. Фақат ушбу қадриятларимизни ривож топтириб ва кўпайтирибгина ҳар бир қозғоғистонлик оила учун хавфсиз ва бахтли келажак бунёд эта оламиз.

\*\*\*

Бизнинг меҳнатсеварлигимиз – муҳим ютуғимиз.

Қозғоғистонликлар элнинг ривожланиши ҳар бир фуқаронинг меҳнатига, билимига, масъулиятни ҳис этишига боғлиқ деб тан оладиган умумий ва ажралмас оила. Ишлагиси келганларнинг ҳаммаси иш топади. Фақат ниёт бўлиши керак.

\*\*\*

Бизнинг одамларимиз бошқа давлатларда нималар содир бўлаётганини тез-тез эсдан чиқариб қўйишади.

\*\*\*

Бизнинг Қозғоғистонда эса ҳар бир фуқаронинг доимий яшаш ва оиласини асраш билангина чегараланмасдан, фарзандларига билим бериш ва келажакни режалаштириш имконияти бор.

\*\*\*

Ривожланган мамлакатлардаги энг асосий қоида бу – иш одамни эмас, одам ишни излайди.

\*\*\*

Агарда биз ҳаёт сифатининг дунёвий намунасида шаклланамиз десак, у ҳолда шунга асосланиб меҳнат қилмоғимиз лозим. Бунда интизом ва меҳнатнинг сифати ўзгача аҳамият касб этади.

\*\*\*

Давлат халқ фаровонлигини орттириш учун қанча-қанча куч сарф қилмасин, агарда ҳар бир қозғоғистонлик ўз тақдирининг меҳнатсевар эгасига айланмаса, элдаги бор яхшиларнинг барчасини эъзозлаб, уларни янада кўпайтирмаса, ишлар баракали бўлмайди.

\*\*\*

Бугунги кунда ҳар бир қозғоғистонлик мустақил равишда элимизга яхшилик қилиб, мамлакатимизнинг бойлигини кўпайтириш мақсадида мен нима қила олдим, деб ўзидан сўраши керак.





● “Мустақилликнинг 30 йиллигига – 30 эзгу иш”

## ҚОРАЧИҚ МАКТАБИДА ФАХРИЙ УСТОЗЛАР БОҒИ



Доимий жамоатчи обуначимиз, “Қорачиқ” умумий ўрта мактаби директори Музаффар Умаров ташаббуси билан мактаб ҳовлисидаги эски қурилишдан бўшаган майдонда фахрий устозлар боғи барпо этилмоқда. Шанба куни эрталаб мактабга келганимда директор Музаффар Умаров ҳамда қишлоқ ўзбек этномаданият бирлашмаси раиси Мирзахон Адхамовлар бир гуруҳ устозлар билан бирга қарши олди.



Туркистон шаҳри таркибида мактаб битирувчилари ЯМТ кўрсаткичлари бўйича 70дан зиёд мактаблар орасида бир неча бор биринчи ўринни эгаллаган. Устозлар жамоаси ушбу аънанани давом эттиришга ғайрат камарини боғлаган.

– Мактабимиз эски биноси бузилгач, ўрнига фахрий устозлар боғини барпо этсак, ҳамда шу ишни юртимиз Мустақилликнинг 30 йиллигига жамоамиз номидан армуғон этсак, деб, ушбу ташаббусни амалга оширишга киришдик. Санокли йиллар ўтиб, боғ мевага киради ва ажойиб манзара намоён бўлади, – деди мактаб директори Музаффар Умаров.

Мактабнинг саховати мўл, деҳқончиликка мойил ўқитувчиси Асомиддин Ғанишев ҳомийлигида юздан зиёд сархил олма ва манзарали арча дарахти

кўчатлари келтирилиб, экишга тахт қилиб қўйилган экан. Ҳомий устозга мактаб маъмурияти ва ҳамкасблари миннатдорчилик билдиришди.

Муборак рамазон ойи арафасида амалга оширилган ушбу саховатли ишдан барча мамнун. Боғ муттасил сўғорилиб, унга ишлов берилади.

Тадбирга таклиф этилган Қорачиқ қишлоқ округи ҳокими Нуржан Аханов, фахрий устоз Авазхон Иботов, маданият бирлашмаси раиси Мирзахон Адхамов ва қатор фахрий инсонлар “Мустақилликнинг 30 йиллигига – 30 эзгу иш” шиори доирасида барпо этилаётган фахрийлар боғи моҳиятига тўхталишди.

Юқорида номлари тилга олинган фахрий инсонлар боғда кўчат экишни бошлаб беришди. Тилаш Иззатуллаев,

Клара Эрметова, Ғулом Нишонбоев, Жаъфар Маменов каби ўнлаб устозлар иштиёқ ила ишга киришиб, олма ва арча дарахтлари кўчатларини экишди.

Ҳомийларга, ташаббускорларга, барча иштирокчиларга миннатдорчилик билдирилди.

2000 йилдан зиёд тарихи бор кўҳна Қорачиқ қишлоғидаги “Қорачиқ” умумий ўрта мактаби ҳовлисида санокли йиллардан сўнг мевали ва манзарали дарахтлардан иборат ажойиб боғ барчанинг кўнглига завқ бағишлаб, меваларидан баҳраманд этишига ишончимиз комил. Мамлакатимиз Мустақиллигига бағишланган эзгу ишлар давом этади.

**Ш. МАДАЛИЕВ.**

**Суратларда:** тадбирдан лавҳалар.

**Муаллиф тасвирлари.**

Кўчат экиб, боғ яратиш – халқимизнинг азалий қадриятларидан бири. Зеро, ўзимиз яшаб турган жойни ободонлаштириш ва кўкаламзорлаштириш туфайли кўнглимиз шодликка тўлади, турмушимиз файзли ва фаровон бўлади.



## 250 ТУП АРЧА ДАРАХТИ ЎТҚАЗИЛДИ

Айни чоғда боғлар, кўчалар ҳамда йўл ёқаларида яшнаб турган дарахтлар чор-атрофга кўрк бериши баробарида, ҳавонинг тозаланиши таъминлайди.

Юртимиз бўйлаб ўтказилаётган “Менинг ўз дарахтим” акциясида барча ташкилот, муассаса ва корхоналарда диёримизни янада обод қилишга қаратилган кенг кўламли ишлар амалга оширилмоқда. Таълим даргоҳининг 90 йиллик тўйини нишонлаш арафасида устозлар тадбирда фаол иштирок этдилар. Мактабимиз ҳовлисида

250 туп арча дарахти кўчати ўтқазилди. Муассаса директори Нурлан Қадиров аҳил жамоанинг фидойи меҳнатидан миннатдор бўлиб, деди:

– Мактабимиз биноси давлатимиз ғамхўрлиги туфайли сифатли тубдан таъмирланди. Энди шу даргоҳ ҳовлиси обод бўлсин, деб, манзарали дарахт кўчатлари ўтқазмоқдамиз.

**Насиба ЙЎЛДОШЕВА,  
М. Ауезов номли умумий ўрта мактаб ўқитувчиси.  
Ўранғай қишлоғи.  
Муаллиф тасвири.**

## АҲОЛИ БАНДЛИГИ – ФАРОВОНЛИК ОМИЛИ

Қозғоғистон Республикаси Меҳнат ва аҳолини ижтимоий муҳофаза қилиш вазирлиги маълумотларига кўра, Электрон меҳнат биржаси ташкил этилганидан буён (2018 йил бошидан) портал орқали 1,5 миллиондан зиёд одам иш билан таъминланган.

«Кадрлар салоҳиятини ривожлантириш маркази» ҳиссадорлик жамияти таҳлилига кўра, биринчи чорак якунларига кўра иш қидирувчилар орасида энг кўп талаб офис-менежери, йўлларни таъмирлаш ишчилари ва ҳайдовчилик соҳаларига жойлаштирилган. Ўз навбатида, иш берувчилар йўлларни таъмирлаш ишчилари, ҳайдовчилар ва хавфсизлик ходимларига муҳтож.

«Эслатиб ўтамиз, Электрон меҳнат биржаси портали Элбоши топшириғига биноан

Қозғоғистон Меҳнат ва аҳолини ижтимоий муҳофаза қилиш вазирлиги томонидан ишлаб чиқилган ва 2018 йил январь ойида ишга туширилган. ЭМБнинг асосий вазифаларидан бири – фуқароларга иш топишда, иш берувчиларга ишчи қидириш ва танлашда ёрдам беришдир. Бугунги кунда 203та бандлик маркази, 6та интернет-дастур ва 54та хусусий бандлик агентлиги ЭМБга қўшилди» дейилади вазирлик хабарига.

**Хабар 24.**

## ЭЗГУ АНЪАНАЛАРГА УЙҒУН ТАШАББУС

Тўлебий туманида Туркистон вилояти ҳокими Ўмирзақ Шўкеев ташаббуси билан ташкил этилган «Ғамхўрлик» хайрия лойиҳаси амалга оширилмоқда. Дастурнинг мақсади – кам таъминланган, эҳтиёжманд оилаларга ёрдам бериш. Айни пайтда туманда 59та кам таъминланган оила рўйхати шакллантирилди. Ҳар бир оилани туман маслаҳати депутатлари, қишлоқ ҳокимлари, мустақил бўлим, муассаса раҳбарлари ва тадбиркорлар оталиққа олишди.



Улар ушбу оилаларни озиқ-овқат билан таъминлайди, қонунлар доирасида ҳужжатларни тайёрлаш ва расмийлаштиришда ёрдам беради.

Айни пайтда туман бўйича 139 оилага 3 миллион тенге миқдорида турли ёрдам кўрсатилмоқда. Хусусан, оталиққа олганлар қийин ҳаётий вазиятга тушиб қолган 59

маҳсулотлари тарқатилди, «Ёшлар имконият маркази» томонидан 10 оилага 150 минг тенге миқдорида моддий ёрдам кўрсатилди. Бундан ташқари, «Halyk Bank»

2021 йилнинг биринчи чорагида манзилли ижтимоий ёрдам оладиган ҳар бир оилага 23 554 тенге миқдорида озиқ-овқат саватлари



оилага 1 миллион тенгедан зиёд моддий ёрдам кўрсатди.

Шунингдек, вилоят этномаданият бирлашмалари томонидан 8 оилага 150 минг тенге миқдорида озиқ-овқат

таратди. Умуман олганда, 62 оилага қарийб бир ярим миллион тенгелик моддий ёрдам кўрсатилди.

**Б. ДЎСМАТОВА.**

● Совет Иттифоқи Қаҳрамони, Болгария Миллий Қаҳрамони Зиёмат Ҳусанов таваллудининг 100 йиллигига



Истеъфодаги полковникман. Журналистик фаолиятимни Кавказда ҳарбий мухбирликдан бошлаганман.

Иккинчи Жаҳон урушида бедарак кетган амаким, падаримнинг ёлғиз акаси – Миртолиб Мирсолиевнинг қабрини ХХ аср ниҳоясигача Иттифоқ, шу жумладан, Россия ҳамда Европанинг бир қанча мамлакатини оралаб, хизмат ва шахсий сафарларга борганимда изладим, афсуски, тополмадим. У “Номаълум аскар” лигича қолди. Қирғинбарот жанглари бошидан кечирган шаҳар ва қишлоқлардаги “Биродарлик қабристонлари”ни зиёрат қилиб, музейга айланган концлагерларга гуллар қўйдим. Отамнинг ушбу васияти туфайли Иккинчи Жаҳон уруши мавзуси ҳаётимнинг мазмунига айланди.

1964 йили бир гуруҳ ҳарбий мухбирлар қаторида каминага Иккинчи Жаҳон урушида қозонилган Буюк Ғалабанинг 19 йиллигига бағишланган “Ботуми – Киев – Минск – Ленинград – Москва – Тбилиси” сафарига иштирок этиш бахти насиб этди. Ушанда Киевдаги “Ватан уруши музейи”да ҳаётимда илк бор, фронт газеталарининг намуналарини учратдим. Дикқатимни ўзбек тилидаги бир газета жалб этди. Мезбонлардан уни кўриб чиқишни илтимос қилдим. Ҳарбий мухбирлигим ҳурмати ушбу газетанинг архивдаги бир нечта сонини танишувга бердилар. Майор Рустам Абдураҳмонов масъул муҳаррир бўлган “Ватан шарафи учун” фронт газетаси экан. Уни варақлаб ўтириб, “Зиёмат Ҳусанов барҳаёт” номли мақолага кўзим тушди ва диққат билан ўқий бошладим:

“228-гвардиячи ўқчи полки сержанти Зиёмат Ҳусанов пулемёт тилини пухта ўрганиб, “Курск ёйи” жангларида иштирок этган. 1942 йили Москва остонасидаги жангларида жасорат кўрсатган. Оғир ярадор бўлиб, ҳарбий госпиталда даволанган. Яна жанггоҳга қайтган. Қисмига етолмасдан, бошқа ҳарбий қисм ўз таркибига “Курск ёйи” жангларида иштирок этиб, мардлик намуналарини кўрсатган... У душман пиёдаси ҳужумларини 45 марта қайтарган, кўплаб фашистларни қирган. 1943 йилнинг августидеги жангда Зиёмат охири гранатани, ярадорлиги сабабли, узоққа отолмай, ўзи ҳам портлаб кетади.

Ушбу қаҳрамонлиги учун Зиёмат Ҳусановга вафотидан сўнг Совет Иттифоқи Қаҳрамони унвони берилади”.

Бу мақола жангчиларни ўзбек халқининг мана шундай ботири, Алпомишидан ўртак олиш ҳамда фашистларни тупроғимиздан қувиб чиқаришга ундайди.

Таассуротларга бой ушбу сафардан хизмат манзилим – Ботумига қайтгач, уйга хат ёзиб, ўқитувчи бўлиб ишлаган отамдан: “Ушбу ҳикоя қаҳрамони мактабдаги математика муаллимимиз Зиёмат аками ёки бошқами?” – деб сўрадим. Йўқ, айнан ўзи экан.

Маълум бўлишича, ўша кунги жангда Зиёмат Ҳусанов тирик қолган, уни ҳушсиз ҳолда немислар асир олиб кетишган экан. Бироз вақт ўтиб, анча соғайгач, ҳамюрти, бухоролик яширин гуруҳ раҳбари бошчилигида 28 нафар жангчи асирликдан қочишади ва барчаси югослав-болгар партизанларига қўшилиб, озодлик курашини давом эттирадilar. Оғир жангларида бирида Зиёмат яраланади. Уни самолётда Италиянинг Торонто шаҳридаги госпиталга етказишади. Жароҳатни даволаш жараёни 1945 йилгача давом этади.

Зиёмат ака уйига қайтади, лекин ҳукумат уни “қаҳрамон” эмас, балки “хоин” сифатида қабул қилади. У маънан қаттиқ эзилади...

\*\*\*

ТошДУнинг журналистика факультети кундузги бўлимида ўқиган йилларим Зиёмат ака билан учрашиб, кўп марта суҳбатлашдим. Унинг дарди энди меникига айланган, адолат тантанаси қалбимга чуқур ўрнашиб, тинчимни бузганди.

Факультет талаба ёшлари етакчиси сифатида ўқитувчиларим – Баҳром Рихсиев, Ирисали Тошалиев ва Тоҳир Пидавлар раҳбарлигида Иккинчи Жаҳон уруши йилларидаги ҳарбий фронт газеталари ходимлари бўлган домлаларим – Расул Муҳаммадиев, Тўғон Эрнараров ҳамда ёзувчилар – Адҳам Раҳмат, Зиннат Фатхуллин, Назир Сафаров, Назармат билан университетда учрашув уюштирдик. Ушанда Адҳам Раҳмат сўзга чиқиши олдидан ўзининг “Улар Ленинградни химоя қилган эдилар” китобини менга ҳадя қил-

# ЖАСОРАТ ВА МАТОНАТ ҚИССАСИ

Бу йил Улуғ Ватан урушида қозонилган Буюк Ғалабанинг 76 йиллигини нишонлаймиз. Ҳар йили байрам арафасида уруш қаҳрамонларини хотирлаб, уларнинг жасоратини мадҳ этамиз, зеро, бу – фарзандлик бурчимиз. Жорий йилги 9 май кун Иттифоқи Қаҳрамони, Болгариянинг Миллий Қаҳрамонига айланган Зиёмат Ҳусанов таваллудига 100 йил тўлади.

Қуйида Сайрам фарзанди, Ўзбекистонда яшаб, узоқ йиллар ҳарбий мухбирлик вазифасини сидқидилдан бажарган истеъфодаги полковник Миркарим Мирсовуровнинг афсонавий қаҳрамон ҳақидаги мақоласини эълон қилмоқдамиз.

ганди. Назармат ака эса чуқур ва теран фалсафаси барча даврларга алоқадор “Қоладур” шеърини ўқиганди:

Умр ўтар, жаҳон қоладур,  
Бунёдингдан эҳсон қоладур.  
Ойдин бўлса юрган йўлларинг,  
Изингдан нур, нишон қоладур.  
Элга ҳиммат азму заҳматинг,  
Қадринг бўлиб виждон қоладур.  
Бу дунёда она – Ватан бор,  
Унда марду майдон қоладур.  
Инсон қалбим бир дунё,  
Унда меҳру иймон қоладур.  
Иш тушганда марднинг бошига,  
Вафоли дўст, инсон қоладур.  
Назар куйлар азиз Эл қадрин,  
Ундан шеър дoston қоладур.  
Утар умр, жаҳон қоладур,  
Фарзандларга эҳсон қоладур.

Устозлар билан ўтган таъсирли, тарбиявий аҳамияти чексиз учрашув тугагандан сўнг, журналистика ва ўзбек филологияси факультетларининг раҳбарлари – Иккинчи Жаҳон уруши иштирокчилари Тўғон Эрнараров ва Анвар Шомақсудов тадбирга ташриф буюрган меҳмонлар-

марта Москвага – СССР Олий Советига, жумладан, раис ўринбосари Ёдгор Насриддинова қабулига ҳам борди.

\*\*\*

Пировардида, ҳақиқат юзага чиқди. Болгария Халқ ёзувчиси Йордан Милов, З. Ҳусанов билан югослав-болгар партизанлари отрядида бирга жанг қилган, у ярадор бўлганда госпиталга жўнатган командири Боян Михнев Чобанов Сайрамга ташриф буюришиб, кенг жамоатчилик иштирокида ҳамюртимизга “Болгария партизанлар ҳаракати қатнашчиси” медалини топширишди ва София шаҳридаги мактаблардан бирига Зиёмат Ҳусановнинг номи берилганини маълум қилишди. Орадан бирмунча вақт ўтгач, Болгария раҳбарияти Зиёмат акани Софияга таклиф қилиб, катта тантаналар уюштиришди ва унга Болгария Миллий Қаҳрамони унвонини топширишди.

1968 йил 23 февралда эса Олма-Ота шаҳрида унга Совет Иттифоқи Қаҳрамони унвонининг гувоҳномаси тақдим этилди.

Ўша йили Ўзбекистон телевидениесининг “Мардлик-мангулик” дастурида



га мақсадимни етказишди. Мен Зиёмат Ҳусановнинг аянчли тақдири, жумладан, 1944 йили унинг Совет Иттифоқи Қаҳрамони унвонига сазовор бўлгани, ушбу фармон 1952 йили бекор қилингани ҳақида сўзлаб, улардан маслаҳат сўрадим.

Устозларим ёрдамида З. Ҳусановнинг 1940 йилда Низомий номидаги давлат педагогика институтидан армия сафига хизматга қақирилгани боис, Москвадаги мукофотлар бўлимига ва Ўзбекистон Олий Советига, Сайрамда туғилиб ўсганлиги боис, Қозоғистон Олий Советига ва ҳатто, эҳтиёт шарт, деб, Болгариядаги Иккинчи Жаҳон уруши партизанлар ҳаракати қатнашчилари кўмитасига, шунингдек, уруш материалларини жамлаган музейларга хатлар ёздик. Зиёмат ака икки

Зиёмат Ҳусанов, “Суворов натиски” фронт газетасининг масъул муҳаррири, профессор Тўғон Эрнараров, генерал Собир Раҳимов раҳбарлигидаги ўзбек дивизиясининг жангчиси Ашуров иштирокида кўрсатув берилди. Ундан сўнг Зиёмат Ҳусанов билан бирга Навоий кўчасида саёҳат қилдик, А. Навоий ҳайкали пойига гуллар қўйдик, “Панорама” (ҳозирги А. Навоий номидаги) кинотеатрида “Халоскорлик” фильмининг томоша қилдик. З. Ҳусанов талаба бўлган Низомий номидаги давлат педагогика институтига учрашувга бориб, “Устоз Зиёмат Ҳусанов” стендини тантанали равишда очдик. Ушанда унга институт раҳбари “Фахрий талаба” гувоҳномасини тақдим этганди.



Қозғоғистон  
Республикаси  
Мустақиллиги  
ва газеталиги



## ФИДОЙИЛИК – УМР ЗИЙНАТИ

– “Жанубий Қозғоғистон” вилоят газетаси халқимизнинг ифтихори, маслаги, кўзгусидир. У нафақат вилоятимизда, балки республикада ҳам ўз мавқеига эга нашрлардан биридир. Мен газетанинг ҳар бир сонини интизорлик билан кутаман. Бугунги кунда жамиятимизда содир бўлаётган воқеалар, янгилар газетанинг ҳар бир сонидан муҳбирлар томонидан кенг ёритиб борилмоқда.

Рўзнома том маънода халқ

Ўттиз йиллик шонли сана билан таҳририят жамоасини қутлаш учун ташриф буюрган “Чимкент” ижодий уюшмаси аъзоси, шоир, ёзувчи, Қозғоғистонда хизмат кўрсатган металлург Турдали ота Усмоновнинг дил изҳорлари ва совғалари барчани хушнуд этди.



Саодат ШАРИФБОЕВА.

## МЕҲНАТ ҚИЛГАН ЭЛДА АЗИЗ

Қорачиқ қишлоқ ўзбек этномаданият бирлашмаси раиси Мирзахон Адҳамов, ўринбосари Қодир Аҳмедов, фаол ёшлардан Саид Хайрулло ташкилотчилигида Мустақиллик байрамининг 30 йиллиги доирасида қишлоқда таълим-тарбия, маданият, қишлоқ хўжалиги ҳамда турли соҳаларда ҳалол меҳнат қилиб эъзоз топган инсонлар республика, вилоят, шаҳар кўламида жамоат ташкилотлари томонидан таъсис этилган мукофотлар билан тақдирланди.



Тадбирга Кентов шаҳар ўзбек этномаданият бирлашмаси раиси Ҳошим Абдувалиев, бирлашма қошидаги оқоқоллар кенгаши раиси Мамасоли Зиёев, вилоят жамоат тотувлиги бошқармасининг Кентов шаҳар бўлими раҳбари Бек Мейирбекули, “Улес” хайрия жамоа жамғармаси раиси



хон Адҳамов, нафақадаги фахрий устоз Қодир Аҳмедов, меҳнат фахрийлари Авазхон Иботов, Клара Эрметова, Тилаш Иззатуллаев, Маҳмуджон Бобохонов, Қаҳҳор Ғанишев, Саида Шарипова, Гулчехра Умарова, Аҳмаджон Эрметов, Ғуллом Нишонбоев, Аб-



Райимжон Қўчқоровлар ташриф буюриб, қишлоқ аҳлини Мустақиллик байрами билан муборакбод этишди.

“Халқ эҳтироми”, “Меҳнат фахрийси”, “Эъзозли устоз”, “Фахрий автоҳайдовчи” каби кўрак нишонни, медаллар, ташаккурномалар тантанали равишда соҳибларига тақдим этилди. Мукофотланганларнинг барчаси “Жанубий Қоз-

ғистон” вилоят ижтимоий-сиёсий газетаси муштарийлари. Улар орасида ўзлари бошқараётган жамоалари билан тўлиқ обуна бўлган ҳамюртларимиз – “Қорачиқ” мактаби директори Музаффар Умаров, тадбиркор, тўйхона ва болалар боғчалари қуриб, янги иш ўринларини яратган Боботой Муютов, қишлоқ ўзбек этномаданият бирлашмаси раиси Мирза-

дуҳолик Мамедов, Ихтиёр Мадалиев каби ўнлаб меҳнатдан обрў топган инсонлар бор.

Мукофот муборак бўлсин!

**Ш. МАДАЛИЕВ.**

Суратларда: тадбирдан лавҳалар.

Муаллиф тасвирлари.



Тулқибош тумани, Озодлик қишлоғи,  
Худойберган ҳожи Ҳайитмат ўғли ва  
Ҳуринисо ҳожи МАДАЛИЕВларга!

Ҳурматли ва азиз ота!  
Сизни қутлуғ 80 ёшингиз билан чин қалбимиздан муборакбод этамиз! Ушбу фараҳбахш кунда Сизга энг эзгу ва самимий тилақларимизни йўллаймиз.



Сиз Ҳуринисо ҳожи ойижонимиз билан 61 йилдан буён сермазмун ва ибратли ҳаёт кечириб, биз – фарзандларни оқ юзиб, оқ тарадингиз, таълим ва тарбия бериб, эл хизмати-га муносиб қилиб етиштирдигиз. Шукурки, бугунги кунда сизларга қариллик гаштини суриш, фарзандлар ва неваралар қучоғида умргузаронлик қилиш насиб этмоқда. Илоҳим, доим сиҳат-саломатликда сулоламингиз фахри ва ғурури бўлиб юраверинглар!

61 йил қўш қанот, собит ва ҳамдам,  
Ҳаёт синовидан ўтдингиз бирга.  
Соғ ва омон юриб, қўша қарингиз,  
Яна кўп йил яшаб, бош бўлинг бизга.

Эҳтиром ила, ўғлингиз  
Ёрмуҳаммад МАДАЛИЕВ оиласи.

### ● Обуначиларимиз орасида

## Қўшқўрғондаги шоир хонадониди

Ўранғай қишлоқ округи ҳокими Сиздиқ Пирметов қабулдан сўнгра қўшқўрғон қишлоғига йўл олдим. Қишлоқнинг нуруний фаолларидан, вилоят ҳокими У. Шўкеевнинг махсус ташаккурномаси билан тақдирланган отахон Йўлдош Қосимов Кентов шаҳрига ишлари билан кетган экан. Қишлоқдаги ўрта мактаб директори Тойир Басанов билан телефонда мулоқотда бўлиб, обуна масаласини муҳокама қилгач, “Жанубий Қозғоғистон” газетасини шу ҳудудда қатор йиллар холис тарқатиб, маърифат, маданият, она тили соҳаларига самимий ҳисса қўшаётган меҳнат фахрийси, шоир Почтахон Бобононовни умр йўлдоши Моҳира Ориф қизи билан тасвирга олдим. Катта йўл бўйидаги мусавффо кўклам шабадаси эсиб турган кенг файзли ҳовлида қирқ йил муқаддам оила қурган ушбу хонадон соҳибларининг ибратли ҳаёти, тарбиялаган қобил фарзандлари, неваралари 30 ёшга тўлаётган мустақил Қозғоғистонимизнинг бахтли оилаларининг бири эканлиги хусусидаги маълумотларни ён дафтарга қайд этдим.



тадбиркорларга тақдим этиши учун Почтахон акага топширдим. Почтахон аканинг “Омонат дунё” деб номланган янги шеърини биргалиқда тингладик.

Тупроқдан яралдик,  
тупроқ бўламыз,  
Туғилдикми ахир,  
бир кун ўламыз.  
Омонат дунёда  
буғун тўрамыз,  
Тақдирга не ёзса,  
шуни кўрамыз.

Яхшилик қилайлик  
ҳар бир инсонга,  
Кўзимиз тўлмайд,  
тупроқ ва чангга.  
Ўлчовли кунлар ато этган  
У сенга,  
Узоқми – яқинми,  
келар барчага.

Умр сурайликчи,  
инсонга лойиқ,  
Яхшими – ёмонми,  
ўзингга боғлиқ.  
Аллоҳдан сўрайлик  
фақат эзгулик  
Тинчлик, хотиржамлик  
ва танга – соғлик.

**М. АЛИ.**

### Директор-Бош муҳаррир учун – Муроджон АБУБАКИРОВ.

Бош муҳаррир  
ўринбосарлари:

**Муроджон АБУБАКИРОВ.  
Авазхон БЎРОНБОЕВ.**

Масъул котиба –  
**Шаҳноза УСМОНОВА.**

### Масъул шахслар:

Туркистон, Кентов — Шомирза МАДАЛИЕВ. 8(72533) 2-40-07.

Тўлебий — Баҳорой ДЎСМАТОВА. 8(72547) 6-07-16.

Қазигурт — Хуршид ҚЎЧҚОРОВ. +7-701-447-37-42.

Сайрам — Мухтабар УСМОНОВА. +7-701-257-97-36.

Тулқибош — Мунира САЪДУЛЛАЕВА. +7-747-144-60-71.

Обуна, реклама ва эълонлар — Зокиржон МҲМИНЖОНОВ. +7-702-278-96-90

Қозғоғистон Республикасида тарқатилди.

Муассис – Туркистон вилояти ҳокимлиги.

Мулк эгаси – “Жанубий Қозғоғистон” вилоят ижтимоий-сиёсий газетаси таҳририяти” масъулияти чекланган биродарлиги.

● Мақолалар, эълон ва билдирувлардаги факт ҳамда далилларнинг тўғрилиги учун муаллифлар, реклама ва эълон берувчилар масъулдир.

● Фойдаланилмаган мақолаларга эъза жавоб қайтарилмайди.

МАНЗИЛИМИЗ: 160000, Шимкент шаҳри, Диваев кўчаси, 4-уй,  
4-қават. Телефон: 53-93-17. Телефон: 53-92-79.  
Бухгалтерия: 39-16-44. +7-747-701-50-55

Электрон почта: janubiy@inbox.ru

Газета ҚР Маданият ва ахборот вазирлиги томонидан  
2020 йил 21 апрелда рўйхатга олинди,  
KZ34VP00022503 гувоҳнома берилган.

Нашр кўрсаткичи – 65466.  
Адади – 11900 нуска.

“ERNUR-print” МЧБ босмахонасида чоп этилди,  
Шимкент шаҳри, Т. Алимқулов кўчаси, 22.

Буорьма:  
865.

Навбатчи муҳаррир: Наргиза МАВЛОҲОВА.